

### **Íbúar Húnavatnshreppi.**

Í þriðja fréttabréfi ársins verður gerð grein fyrir ýmsum málum sem unnið er að í sveitarfélaginu og kynnt hreinsunarvika sem verður nú í júní.

### **Íbúafundur/sveitarfundur**

Íbúafundur vegna aðalskipulagsgerðar, sem haldinn var á Húnavöllum þann 29. apríl s.l var ákaflega vel heppnaður að mati skipulagsráðgjafa og fulltrúa Staðardagskrár 21. Þeir voru ánægðir með þær ábendingar sem fram komu á fundinum og þá hugmyndavinnu sem þar fór fram. Skipulagsráðgjafarnir eru að vinna úr gögnum frá fundinum og munu skila fljótlega fyrstu drögum að greinargerð aðalskipulagsins.

Almennur sveitarfundur var haldinn á Húnavöllum þann 4. maí s.l. Fundinn sátu á milli 40 og 50 manns. Þar gerði oddviti grein fyrir helstu þáttum í starfsemi Húnavatnshrepps á síðasta ári, ársreikningar Húnavatnshrepps fyrir árið 2007 voru kynntir og almennar umræður voru um málefni sveitarfélagsins. Talsverðar umræður urðu um atvinnumál, sameiningarmál, samgöngumál og fl.

### **Sumarvinna ungmenna.**

Gerður hefur verið samstarfssamningur við Blöndustöð um sumarvinnu ungmenna. Húnavatnshreppur greiðir hluta af launum og fær í staðinn aukið vinnuframlag ungmenna frá Blöndustöð, um er að ræða vinnuframlag 2 til 5 ungmenna í allt að 10 vikur. Unnið er að verkefnaáætlun fyrir sumarið og keypt hafa verið áhöld og verkfæri vegna starfseminnar.

### **Ýmsar framkvæmdir.**

Lokið er við þakviðgerðir á kjarnabyggingu Húnavalla. Verkið reyndist talsvert umfangsmeira en áætlað var og var heildarkostnaður um 2,5 milljónir kr. Samþykkt hefur verið að ganga til samninga við Húsherja ehf um viðgerðir á þaki íþróttasalar á Húnavöllum.

Áætlað er að framkvæmdir hefjist í byrjun júní. Áætlaður kostnaður er um 4,5 milljónir kr.

Samkvæmt verksamningi við Stíganda ehf þá var gert ráð fyrir að verklok við byggingu leikskóla yrðu 31. maí 2008. Af ýmsum orsökum hefur verkið tafist nokkuð og er nú gert ráð fyrir að verklok verði í lok júní n.k.

Í sumar verður lokið við niðursetningu rotþróa og siturlagna í fyrrum Bólstaðarhlíðarhreppi, einnig verður haldið áfram við niðursetningu á ljósastaurum við heimreiðar. Reiknað er með að bjóða síðan út áframhaldandi framkvæmdir við rotþrær.

### **Hreinsunarvika. Átak í hreinsun umhverfis á lögbýlum.**

**Frá og með mánudeginum 16. júní til föstudagsins 20. júní fer fram hreinsunarátak í Húnavatnshreppi. Fjarlæggt verður brotajárn, timbur, spilliefni, dekk, rúlluplast og áburðabokar frá þeim lögbýlum sem þess óska. Mikilvægt er að flokka ruslið þannig að járnni, timburúrgöngum, plasti og spilliefnum sé haldið aðgreindu og að auðvelt aðgengi sé að því til lestunar á bifreið. Þeir aðilar sem óska eftir þessari þjónustu eru beðnir um að hafa samband við skrifstofu Húnavatnshrepps í síma 452-4660 eða 452-4661 fyrir mánudaginn 16. júní n.k. Íbúar eru hvattir til að hreinsa vel umhverfi sitt og taka þátt í hreinsunaráttakinu.**

### **Skrifstofa Húnavatnshrepps.**

Skrifstofa Húnavatnshrepps er opin mánudaga, þriðjudaga, fimmtudaga og föstudaga frá kl. 10.00 – 16.00. Símanúmerin eru 452-4660 og 452-4661, faxnr. er 452-4680, netföngin [hunavatnshreppur@emax.is](mailto:hunavatnshreppur@emax.is) [jens@emax.is](mailto:jens@emax.is) veffang [www.hunavatnshreppur.is](http://www.hunavatnshreppur.is)

Húnavöllum 3. júní 2008.  
Sveitarstjóri Húnavatnshrepps